



Sabtu, 20 April 2024
Ogen: Josua 1:6-9



Tetap Ukur Ras Tek



Lit sekalak diberu si nguda denga rempet perbulangenna sakit mekelek. Anakna angkip-angkipen denga, usia sada tahun. Ban kelekna pinakit perbulangenna iakap rusur menam idilo Dibata, biaya pertambar pe she kal buena. Dahin pe nggo lolo ban ngarak-ngarak pertambar. Erberngi-bergi la tunduh ngarak-ngarak perbulangen dingen ngepkep anak kitik si denga, piah ia pe nggo kurang kesehatenna. Teman, keluarga kerina nilah ban beratna perbeben keluarga enda, iakapna kena mara. I bas sada wari, lanai ieteh diberu ndai ku ja nari nuriken ukurna. Ibuatna Kitab Enden-enden, rende ia, erjimpuh pasrah man Tuhan. Reh nina i bas pertotonna "O Tuhan engkai maka kam sinik saja ngidah aku bagenda? Ngeranalah kam. Uga kari kubahan anakku si kitik denga enda. Mbiar kal aku ndalani geluh enda si sada, adi la je perbulangennku, tapi gundari mekelek penakitna... uga nge nindu e Tuhan." Kenca ibelaskenna pertotonna, iogena sada kitab e me kitab Josua. Ibenakenna ngoge i bas pasal si pertama nari. Iogena sada pasal e, tertuju pandangenna ku bas ayat 7 ras 9, **tetap ukur ras tek** i bas cakap Indonesia **kuat dan teguhkanlah hatimu**. Aminna gia teks enda kerna Tuhan si nuruh Josua ertetap ukur mabai bangsa Israel bengket ku taneh Kanaan. Tapi i bas pusuh sidiberu ndai, maka e jawapen Tuhan kerna pergumulenna, gelah tetap ukur ras tek, kerina enda si idalani diberu e bekas peraten Tuhan, adi megegeh dingen tetap ukurndu seh nge kari pengarapenndu e, bagem pengertinna kenca ialokenna kata Tuhan. Kenca si e diberu ndai jadi megegeh. Megegeh ngarak-ngarak perbulangenna, megegeh mpekena-kena anak bage pe ndahiken dahinna. Reh kurangna kebiarenta reh benena kelemahenta, reh tajamna kelebihenta reh gegehna kita.

Tetap Ukur ras Teklak, Tuhan Kap Bapa